

# Kristian Naupang



Vol. 25 Issue No. 297

[www.mizoramynod.org](http://www.mizoramynod.org)

## HSLC 2019 TOPPER Lalrinnungi

Sâwma Pakhat.....	4
Innghahna tlâk Pathian.....	6
VBS III-2019 kha in hmang ve em?.....	10
Aia upate zah.....	14

*Editor***Rinsailovi***Managing Editor***Rev. Dr. C. Chawngmingliana***Joint Editors***Rev. P.B. Mankima****Upa B. Lalhmunliana****Upa R. Zolura****R. Lalbiakdika***Circulation Manager***Lalfakzuala**

# **KRISTIAN NAUPANG**

**Synod Office, First Floor****Mission Veng, Aizawl -796001****Phone - 0389-2324590****e-mail:****kristiannaupang@gmail.com****A man pe duh leh a bu la duh chuan****Circulation Manager hriattir tur a ni.****Kum khat lak man ₹50**

*Kristian Naupanga thu chbuahte hi Editor ngaih dan a ni vek kher lo*

## **A chhûnga thu awmte**

## **Phèk**

- |  |    |
|--|----|
| 1. Editorial.....                                | 1  |
| 2. Hmawmsawm ei mai mai that lohzia.....         | 2  |
| 3. Sawma pakhat .....                            | 4  |
| 4. Innghahna tlak Pathian .....                  | 6  |
| 5. Naupang rinawm Athana - IV.....               | 8  |
| 6. VBS VIII-2019 kha in hmang ve em? .....       | 10 |
| 7. Aia upate zah .....                           | 14 |
| 8. Interview: Lalrinnungi, Topper HSLC '19 ..... | 17 |
| 9. Hriatzauna Huang .....                        | 21 |
| 10. I hria em?.....                              | 24 |
| 11. Chei rawh le .....                           | 31 |
| 12. Ka hmuh ang hmu thei rawh.....               | 32 |

# e**ditorial**

---

## NGAIHHLUT TÛR DIK

Mi tu pawh mai hian ngaih hlut zâwng kan nei vek a. Kan ngaih hlut zâwng erawh chu a inang lo viau âwm e. ðhenkhat chuan zirna lama mi hlawhtling tak tak te an ngaihsâna an ngaihhlut viau laiin ðhenkhat erawh chuan hmêlþha te, pian nalh te, zai thiam te, lemchan thiam te leh thil dang dang ti ðhîn te kan ngaisângin anmahni ang nih kan châk ðhîn.

Kan ngaihhlut zâwng hian kan rilru a hruai nasat theih êm avâng leh anmahni ang nih kan tum tlatna hian keimahnia theihna awm hi nasa takin a tipung thei a. Tumruhna leh taihmâkna nêna kan beih pheih chuan kan nih tum tak niin mi hlawhtling tak kan ni thei ðhîn.

Eng mi hi nge kan ngaihhluta, kan ngaihsân tih chu mahni ðheuh inzâwt ila. Kan ngaihhlut zâwng hian kan hma lam hun atân eng nge min thlen ang tih erawh chu ngaihtuah hmaih hauh loh tûr a ni. Ngaihhlut tûr dik thlang fuh loten hma lam hun êng tak an nei lo fo va, chutih rualin ngaihhlut tûr dik thlang thiam erawh chu an hma lam hun atân nasa takin an inbuatsaih a, an ngaihhlut leh an ngaihsân ang nih tumin theihtâwp an chhuah a, a tâwpah an hlawhtling nge nge ðhîn.

Kan rilrua kan tum leh kan ngaihhlut zâwng hian nasa taka min hruai theih avângin kan rilru sùkthlêk a dik a ngai a, chu chu hlawhtlinna kawnga min hruaitu pawimawh tak a ni bawk. Hlawhtlinna hi mi dangte chan tûr chauhva dah tûr a ni lo va, a zawng peih leh a ban peih apiang ta a ni tih hriat a pawimawh bawk. Ban phâk ve lo nia inngaihna rilru hi paih bova, miin an tih theih chu ka ti thei ve a ni tih hre chung a tumruhna leh huaisenna nêna beih a ngai.

Tûn aþang hian kan ngaihhlut zâwng hre Chiang ila, ngaihhlut tûr dik tak kan hriata kan thlan theih nân kawng dika min hruai theitu tûrte thurâwn leh thusawi te ngaichângin i ngaihven ðhîn ang u.

# HMAWMSAWM EI MAI MAI THAT LOHZIA

- Sarah Vânlalrinsângi  
Primary Dept. Lily Vêng North

**H**mânlai hian unau hmeichhe pahnih hi an awm a, a upa zâwk chu Lalremsiami, kum sâwm mi a ni a, a naupang zâwk chu Lalhmunsiami, kum sarih mi a ni a. Unau inngeih leh nu leh pa thu âwih tak an ni a, chhông inkhawm pawh ni tin an hmang thîn a ni.

Ni khat chu Remsiami leh Hmunsiami te unau chuan an thiante Nunkimi te thil ei lai chu an hmu a, an ei ve châk êm êm a. An nu leh pate hnênah lei ve an dîl a, a nu chuan thil tangkai lo leh mamawh loh chu lei mai mai lo tûr leh pawisa tihek lo tûrin a lo hrih a. Remsiami leh Hmunsiami te unau chuan an thiante thil ei lai chu awt ve hle mah se an nu leh pate thu chu an âwih ta a.

Ni khat chu Nunkimi chu school-ah a pum a na thut mai a, an zirtirtu pahnih Sir Zomuana leh Sir Hruaitluanga te chuan damdawi in casualty-ah an kalpui nghâl a. Nunkimi chhôngte pawh phone-in Nunkimi dam loh thu leh damdawi ina an kalpui thu an hrih a. Anni pawh damdawi in an thleng ve thuai a. Doctor duty lai chuan a lo en nghâl vat a, a pum natna chhan te zawngin kawchhông enna (ultrasound)-a an han en chuan a pumpui chu a lo lâwng a.

Doctor chuan Nunkimi leh a chhôngte hnênah chuan thil ei leh in fîmkhur a ngaih thu leh hmawmsawm ei vak vak lo tûrin a lo hrih a. Hetia a natna chhan pawh hi hmawmsawm ei nasat vâng leh ei leh in tûr fai lo, hrisêl lo a ei vâng a ni tih a lo hrih a. Damdawi te pein a hnu deuhah



chuan Nunkimi pum nâ chu a lo ziaawm ta a, damdawi in aṭangin an haw ta a.

Remsiami leh Hmunsiami te chhûngkua pawhin an chhûng inkhâwmnaah Nunkimi chu a lo dam lehna tûrin Pathian hnênah an dîlpui a, a tûkah chuan an unauin Nunkimi chu an va kan a, ani chuan hmawmsawm a ei mai mai dâwn tawh loh thu te leh ei leh in fîmkhur a, silfai hmasak loh chu ei tawh lo tûrin a intiam a. Remsiami te unau hnênah chuan anmahni anga hmawmsawm ei ve mai mai a tum tawh loh thu a lo hrilh a. Remsiami te unau chuan an nu leh pa thu âwiha hmawmsawm an ei ve mai mai loh avângin natna tam tak an tawrh ve loh phah a ni.

Chhiartu duh tak, nang pawh Remsiami te unau ang hian hmawmsawm leh thil tûl lo ei mai mai lo tûrin ka ngên a che. Thil tûl lova pawisa hman ralna a ni bawk si a.

---

### THIH THLENGA RINAWM

Pompei tih lehkhabu leh film chhiar emaw, en tawh emaw chuan kan hria ang a, AD 79-a Vesuvius tlâng kâng (volcano)-in khawpui ropui tak a chhilih bo tâk kha a ni a. Rilru a khawih hle.

Walker Art Gallery, Liverpool-ah khuan he thil thleng - Rom sipai pakhat a duty laia chirhin a tihhlum painting nalh tak an tar a, a hmingah ‘thih thlenga rinawm’ an vuah nghe nghe a, miin an hmu duh hle.

Bible-ah hian thih thlenga rinawm tûrin Smurna kohhran hnênah lehkha thawn a ni a (Thup 2:8-11). Tihduhdahna nasa tak an tuar a; nimahsela, an zâm lo. Lung inah an khung a, tihhlum an ni bawk a. An tuar nasa êm êm a. Kum AD 155-a Polycarp-a martara thi ta pawh kha Smurna khaw Puithiam a ni.


Kum AD 122 vêla Antiokei khaw mi Ignatius-a, Rom-a martar tûra a kal tum kân Smurna khua kohhran hi a tlawh nghe nghe bawk a.

Thih thlenga rinawm te hi waviin thlengin khawvêl thilah pawh chawimawi (respect) an ni a, Krista avângu tuarna phei chuan vânah lâwmman tam tak a nei dâwn si a.

*“...Thih thlengin rinawmin lo awm rawh,  
tichuan nunna lallukhum ka pe ang che,” (Thup 2:10).*

# SÂWMA PAKHAT

– PC Lalmuanpuii  
Junior Department  
Chawnpui Vêngthlang  
Kohhran



Golgate hi in hria em le? ‘Golgate’ tih hming a put chhan in hria em le? Awle tânah ‘Golgate’ tih hming a put chhan leh engtin nge a siam chhuaktu hi a hlawhtlin theih i lo chhui chhuak dâwn teh ang.

Wawi khat chu tlangvâl pakhat hi hna zawng târin khawpuiah a kal a, mi pakhat nêh hian an intâwk a, chupa chuan, “Tlangvâl, khawiah nge i kal dâwn?” a ti a. Tlangvâl chuan, “Khawpuiah hna zawng târin ka kal dâwn a,” a ti a. Chu pa chuan, “A nih tak chu a, thurâwn kan pe ve mai mai ang che. Eng hna pawh thawk la, sâwma pakhat pêk theihngihl ngai suh ang che,” a ti a. Tichuan, chu pa chuan tlangvâl chu duhsakna a hlân a, an inthen ta a.

Tlangvâl chu a kal zêl a, khawpui chu a thleng ta a. Sahbawn siamna company-ah hna a hmu hlauh mai a, khawpui a thlen hmaa mi pakhat thusawi kha hre reng chungin hna chu a thawk ta a, sahbawn siam chu a han zir a, a lo thiamin a hlawhtling khawp mai a, sâwma pakhat pe pah zêl chungin hna chu a thawk zêl a, a hnuah chuan tootpaste siam te a han zir leh a. Chu pawh chu a hlawhtling khawp mai a, sâwma pali te a pe ta hial a. A tootpaste siam chu tânlaia kan hriat lâp êm êm Golgate a ni a, a siamtu hming chu William Golgate-a

a ni. Pathianin mal a sâwm a, a tootpaste siam Golgate hi tootpaste zînga lâr ber ang deuh thaw, hman nasat ber leh mipuiin an hriat deuh fur a lo ni ta a ni.



Ka naupangpuite u, nangni pawh in len hunah sâwma pakhat pe ðheuh tûrin ka ngên a che u. Mi hausâ â pawh kha mi retheite a ðanpui ngai loh bâkah malsâwmtu Pathian a pêk lêt loh avângin Lalpan a thil neih zawng zawng – a hausakna, a kawr leh a thil neih ropui tak tak te aia hlu zâwk nunna a lâksak ta a nih kha.

A tâwp berah chuan sâwma pakhat hi Lalpa chanpual a ni a, sâwma pakhat kan pêk loh chuan Pathian ta ei ru kan ni mai.

---

## THAWHLÂWM KHAWN KA DUH LEH TAWH

Nu upa lam tawh pakhat, tlêma mi ang pha zân lo, a hmêla Pathian khawngaihna min hmuhtîrtu ni bawh si hi a lo lêng ðhîn a. A pasal sùn khawhar chu an kawmthlanga nupui sùn ve tawh tho putar pakhat nêan lo inneih ve ngawt avângin kohhranten kan thunun a ðûl a.

An thununna thla pawh a la ral lo tihah chuan dân chhûnga luh a duh thu a sawi ta mai a. Thla ruk tal nghah a ngaih thu a hriat chuan a lungngai êm êm a. ðha taka inkhâwm ðhin tûrin an hrih a.

Chuta chin chu ni tin deuh thawh hian Kohhran Hmeichhe inkhâwma thawhlâwm khawn a châkzia te, dân pâwna awm hrehawm a tih thu te a sawi leh ðhîn a. He nu thusawi hian ngaihtuahna a tithui khawp mai.

Pathian rawng hi duh duh hunah a bâwl theih ngawt dân hauh lo mai. Kan hma lam kan hre lo va, a thih te pawh kan la thi dân. Kan ðhat lai, kan chak ðhat laia lâwm tak leh hlim taka a rawng bâwl mai hi a lo hlu ber mai a lo ni.

# INNGHAHNA TLÂK PATHIAN

– R. Lalbiakzuali  
Sacrament Department, Ramthar Vêng

Thingtlâng khaw pakhatan hian chhôngkaw pakhat hi an awm a. An pa ber hming chu Pu Rama a ni a, a nupui hming chu Pi Mawii a ni a, fa pathum an nei a, an la naupang hlawm êm êm a ni. Chawhmeh an zuar thîn a, an khawsa ve tawk tawk a, an pa ber lah chuan zu a in reng mai bawk si a. An nu ber pawh chuan zu chu a rilru hah chhâwkna a nih ringin tlêm tlêma in a chîng ve a, a lo rei deuh pheih chuan an nu ber chuan a in nasa ve ta êm êm a. An nupa hian zu an ruih châng chuan an inhau nasa thei êm êm a, an fate pawh an ngaihsak lo va, an fate chuan hrehawm an ti thei êm êm a. Kum tam pawh a liam hma chuan an nu ber chu a lo hisêl lo ta êm êm a, an fate an lo tleirâwl chhoh tirh chuan an nu ber chu a thi ta mai a.

Pu Rama chu a nupui thih hnu chuan a lunglêng thei êm êm a. Pathian auh nachâng a hre lo va, zu a in vak vak a, hmeichhe kawp te a chîng a. Mahse, a lungngaihna chhawktu eng mah a hmu si lo. Gospel camping-ah a lût ve ta a. Pathian hmangaihna hriain a piangthar ta hlauh mai a, a nun pawh a hlim ta êm êm a.

Chutia a nun a lo inthlâk tâkah chuan a fate nêh pawh hlim takin an khawsa ho a, a fate pawh chuan nupui pasal an nei ve ta a. Pu Rama pawh a la upa lo bawk a, an khaw nula fel tak Puii nêh chuan an innei ve leh ta a. Fa pakhat an nei a. Hlim taka an awm lai chuan Pu Rama chu a thiantê nêh an

ram kal haw hi a khua a sik vak mai a, a thaw te a hah êm êm a, damdawi inah an kalpui a, doctor leh nurse-ten theihtâwp an chhuah a; mahse, chauh lam a pan telh telh mai a, a nupui leh fate chu an mangang êm êm a, Pathian hnênah theihtâwp chhuahin an țawngțai a, Pathianin an dılna te a chhânsak a, zawi zawiin ziaawm lam a pan ve leh ta a.

Thla khat hnuah dam takin in lam panin a haw ve leh ta a ni. Mahse, a hnu rei vak lovah a nupui chu a damlo ve ta vak mai a, nasa taka an enkawl pawhin awmzia a awm thei lo va, a thi ve leh ta mai a. Pu Rama chu a lunglêng thei êm êm a; mahse, Pathian thu a âwih avângin kohhran a bêl tlat a, harsatna a tawhnaah pawh zu in lovin Pathian hnênah a țawngțai a, thlamuang takin a awm theih phah ta a ni.

A fapa pawh lehkha thiam thei tak a ni a, a lo tlangvâl chho a, a pa nêh kohhran an bêl tlat a, a zirnaah a hlawhtling chho bawk si a, a pa duh ang takin Pathian thu a zir a, a lo zir chhuah hnu chuan Pastor a ni ve ta a, an khawsak pawh a nuamin mi harsate an lo țanpui thei ta hial a ni.




---

*Naupang rinawm*

# ATHANA-IV

- Rev. H. Laldintluanga, Hnahthial

Thingtlâng naupang tâna nghahhlelhawm tak thîn pakhat chu exam chawlh laia nu leh pate nêna ramriah kha a ni. Thingtlâng mi tam zâwk chu lo neia ei zawng an ni a, an lo awmna a hlat tham deuh phei chuan riakin hna an thawh chilh thîn. Athana nu leh pate pawh hi lo neia ei zawng an ni a, ram an riak fo a, in lamah a u hoin in an lo nghâk thîn a ni.

Vawi khat chu an exam chawlh laiin Athana chu a thiante nêna, a nau mipa naupang nêna chuan loa riak ve tûrin an kal a, lo an thlen chuan an riah bûk thlâm chu inhnaih tê tein an lo sa a, inkal pawh theih vekin an thlâm tlaitlân (veranda) te chu an dawh zawm vek tih an hmuh chuan nuam an ti hle a. A nau te leh a thiante chu an tlân lâwn zung zung a, an hlim hle.

Thlâm pakhat tlaitlânah chuan mai hi an lo dah t̄euh mai a, mai chu ina phurh haw tûra an dah th̄at a ni a, vawk chawah leh chawhmeh atân te an hâwn th̄in a ni. Athana chu an thlâm chhûngah chuan a lût a, a indah fel lai chuan a nauteho chu hlim êm êm hian an nui leh vak vak th̄in a. Eng nge an nuih tih en tumin pâwnah chuan a va chhuak a, a nau mipa naupang pakhat leh a th̄ianpa pakhat chuan an hmawlh ken chuan mi mai dah th̄at kha a hn̄un an lo invuak thlawnsiak a lo ni a. Athana an hmuh chuan, “A u, lo kal ve rawh hei vuak thlawn a nuam lutuk,” an ti a. Athana a va thlen chuan mai hn̄un tam tak chu an lo vaw thlawn tawh a. Athana chuan, “Ehe, ngati nge khatia in vuak thlawn mai, a hn̄un a tel loh chuan rei lo teah a t̄awih chhe vek dâwn asin. A neituten an hau ngei ngei

ang che u,” a ti a. A paw ti chu a chek tlawk tlawk mai a, “Engtin nge ka tih ang aw, ngaihdam dîl a ngai dâwn a nih hi,” a ti a. Chu mai neitu lah chu an mi hriat chian,



hmeithai phunchiar leh mi hau hrât, miin an nêl vak loh a ni lehngâl a.

Tlai lamah chuan hnathawkho an lo bâng sap sap a, mai neitunu pawh chu a lo haw ve ta a. Athana chuan hreh tak chungin chu nu chu thlâmah chuan a zui lût a, a nauten hre loa an lo tih dân leh pawh a tih thu te, a hriat ve meuh chuan mai hnûn tam tak an lo vuak thlawn thu chu a thiam ang ang chuan a hrilh a. An khaw nu, an hlauh ðhin êm êm chuan Athana chu a en a, “E, paw ti suh, naupang â an nih kha, mai te chu kan ngah alâwm,” a lo ti daih mai a. Athana chu a thaw huai a. A chhan ber pawh Athana hi an khaw mi zawng zawngin naupang fel leh thu âwih, thil ru ve ngai lo leh mi rinawm a ni tih an hre vek a. A rinawmna avâng liau liauin a nau chuan mi hau a pumpelh a ni.

Josefa chu mi rinawm a ni a, a unauten an îtsîk avângin Aigupta ramah sal atân an hralh a, hrehawm nasa tak a tuar pah a ni. Mahse, a rinawmna leh a felna chuan a nu leh a pa, a u leh nau, mi sawmsarih lai mai, ei tûr nei loa thi mai tûrte nunna chu a chhan chhuak a nih kha. Chhûngkuua member pakhat chauh pawh a rinawm chuan an chhûngkaw tân mawlsâwmna a ni thei a. Chhûngkaw member zawng zawng an rinawm vek phei chuan khawtlâng tân pawh malsâwmna a ni thei tih hriat reng tûr a ni.

# VBS VIII-2019 kha in hmang ve em?

- H.Lalrindika  
Ramhlun Vênglai Kohhran

MSSU-in VBS VIII - 2019 neih dân tura a sawi angin Ramhlun Vênglai Kohhran Naupang Sunday School chuan hlawhtling takin kan hmang thei a, kan lâwm hle. Group I leh Group II te hi hmun khatah awmin hotu hran an nei a, Group III te pawh a hranga awmin hotu hran an nei ve tho a ni.

Group I-ten an zirlaite an zir zawhah an zirlaia mi, Samuela leh Mosia lem an chei a, an chei thiam si a, nuam an ti êm êm a. An chei nalh êm êm a ni. VBS-ah milem in chei ve em?

Group II-te chuan an zirlai an zir zawhah an zirlaia mi Davida, Josua leh Gideona te nun ațanga entawn tûr leh zir tûr an hriatte an ziak chhuak a, hetiang hian an ziak.

## **Davida nun ațanga zir tûr, kan zir chhuahte –**

1. Pathian a ring a, Goliatha a that thei
2. Huaisen





3. Pathian hnenah ngaihdam dil ziah tur
4. Hnehna chu Lalpa ta a ni
5. Pathian chakna hmangin engkim kan ti thei
6. Lalpa ðih
7. Khua leh tuite dik takin ro a rêlsak
8. Nu leh pa thu âwih
9. Rinawmna
10. Inrin tâwkna

**Josua nun aţanga zir t r, kan zir chhuahte –**

1. Kan thiltih t rah Pathian kan r wn hmasa ð n ang
2. Pathian thu a âwih
3. Kan bulah Pathian a awm tih hriat
4.  awng ai  at
5. Pathian thu âwih chuan eng mah a hlauhawm lo
6. Huaisenna
7. Pathian chakna hmangin engkim kan ti thei
8. Thu âwihna
9. Pathian rinna tl kchham loh
10. Rinawm



**Gideona nun aţanga zir t r, ka**

1. Pathianah rinna a nghat tlat a,
2. Inngaihtl wm





3. Lalpa hnênah chakna kan dîl ang a, sual kan hneh thei
4. Pathian thu âwih
5. Pathian thupêk a hnial ngai lo
6. Pathian thu a hnial ngai lo
7. Pathian râwn chung a thil tih tûr
8. Pathian ãih loh pawizia
9. Engkima Lalpa duh dân zawm zêl
10. Pathian chakna rin

Tin, Group II-ten nu leh pa thu âwih dân ãha hetiang  
hian an ziaak –

1. Tirh hnial loh, min hauhin nu leh pa chhan pâwng pâwng loh
2. Nuar loh tûr
3. Kan nu leh paten tih loh tûr an sawi chu kan ti lo ang
4. An thiltih tihpui
5. Nu leh pate ãawngkam ãha loin kan be lo ang
6. ãha taka lehkha zir
7. Nu leh paten thu ãha min hrilh ãha taka âwih
8. Tih tûr an sawi apiang tih
9. Nu leh pate hmaah tihtauh loh tûr
10. Ti rawh an tih apiang tih
11. Zûk leh hmuam leh ruih theih thil tih loh

12. Nu leh pa bula dâwt sawi loh
13. Lêng suh an tihin kan lêng lo ang
14. Hmun kan phiat ang
15. Tih tûr an sawi apiang tih
16. Nu leh pa bula dâwt sawi loh
17. Nu leh pate ân khum loh tûr
18. An damlohin ngaihsak tûr
19. Thil kan duh an phal lohvin hnial loh
20. Kan runlui lo ang

Group II-ten ṭhian ṭha nih dân hetiang hian an ziaḱ–

1. Keimahni chauh ṭawng lovin, kan ṭhiante thusawi kan ngaihthlaksak ve ang.
2. Thurûk zêppui
3. Vânrâm kal tûra theihtâwpa ṭanpui
4. An dam loh laia ṭawngṭaisak
5. Ṭhiante rel loh a, phakar loh tûr
6. Harsatna an tawh laia ṭanpui
7. Thil sual ti lo tûrin kan fuih ang
8. Kan ṭhiante tân kan rinawm ang
9. Puih an ngaih chuan kan pui ṭhîn ang
10. Ṭhiante tân uikawm loh tûr
11. Pathian hnaiha ṭhiante awmpui
12. Ṭhiante hmuhsit loh tûr
13. Ṭhiante nênr insual loh a, infiampui ṭhin
14. Thil thiam loh inhrih ṭhin
15. Ṭhiante tihduhdah loh tûr
16. Thil min pêkin lâwmthu sawi ṭhîn ila
17. Thil sual an tih laia, thu ṭha hrih zêl
18. Ṭhiante bulah thilphal tûr
19. Intih thu bîk loh a, inkawm hran loh
20. Thil kan ei dunin a tâwp ber (last piece) kan eitîr ang.  
Isua hnêna an nun kaihhruai

# AIA UPATE ZAH

- C. Lalhmingliana  
ITI Veng

*“Aia upate zah thiamin,  
An thute âwihin zâwm fo rawh;  
Pipute ro thil hlu a ni,  
Aia upate zah thiam rawh.”*



Mizote hi aia upate zah thiam êm êm hnam leh aia upate zah tûra inzirtîr tam ber pawh kan ni âwm e. Tûnhma lam chuan thing nawi fawm te a awm thîn a, chûng thing nawi fawm pâwlte chu râwlthar rual an ni a, hotu fel tak kaihhruaiin mi chhiatniah te an ãangkai thîn hle a ni.

Awle, aia upate han tih hian, keimahni aia piang hmasa leh kum tam zâwkte sawina a ni a, mipa emaw hmeichhia pawh ni sela kan aia upa tawh phawt sawina a ni. Chutiangin kum upa zâwk an nih avânga an zahawmna hriatsaka ngaihhlutsak leh an thu âwih te chu ‘zah’ tih awmzia chu a ni. Mizo naupang i nih chuan aia upate i zah tûr a ni a, chu chu pipute dân a ni. Chu chuan kan khawtlâng nun a tinuam êm êm thîn a ni. Tlâwmngaihna tih thu nêh a inang viau mai. Mi tlâwmngai lo chuan aia upate an zah thiam thîn lo a ni. “Tûnhma chuan Mizo naupangte rêng rêng hian an aia upate an zah thiam thîn a, tleirâwl te, tlangvâl te pawhin an aia upate an zah thiam thîn. Nu leh pate leh tarte meuh pawhin an aia upate thu an âwih a, an zah thiam thîn a ni. Tlangvâlte pawhin an khuaa vâl upate thu an âwih êm êm a, tîrh an hnial ngai lo, chu chuan inpumkhatna ãha a hring fo thîn.

City Bus-ah mawlh hian aia upate zahna a bo ta emaw tih tûr a ni. Tar leh upate âwl tum lam rêng a lang ta lo. Tar chak lo leh kum upate thutna ken hi a Mizova, a mawi bawh.

Mizote chauh ni lovin, hnam changkâng leh hmasâwn tia kan chung ente hlei hlei hian an aia upate an lo zah thiam ðhîn a ni. Tar leh kum tam zâwkte phei chu an zahin an duat thei êm êm a, an chawimawi thiam hle ðhîn.

Keini Mizote pawh hnam la upa lo tak ni mah ila, ka pi leh pute kha aia upate zah thiam kawngah hian an ti ðha hle a, entawn tlâk tak an ni. Zir sân leh thiamna sân vânga aia upate hnuaichhiah mai hi an tih dân a ni ngai lo. Tùm khat pawh Danny-a hi a lo zir sân a pâwl a lo tam tâk viau hnu chuan a nu, amah hringtu ngei chu mâwl a ti tlat mai a, a nu chuan, “Danny, kan Prime Minister hming kha ka theihngihl daih mai a,” a ti dêk dêk a, Danny-a chuan a nu chu, “I va han mâwl êm êm, chûng mai mai hriat loh te chu a, mi kêrah te i sawi palh ang e, a zahthlâk,” a ti ta hrep mai a, a nu rilru chu a na kher mai. A fapa chu a rîla rah, a hnute hnea a chawi len leh theih tâwka a enkawl kha a ni a, a rilru na pawh a âwm rêng a ni. Fapa lehkathiam chher chhuaktu a nihzia kha Danny-a hian a hre lo tlat mai a ni. A nu chu a thih hnua h a nu hlutna chu a hre chhuak a, a ðap tlawk tlawk mai a; mahse, a sâwt tawh si lo. Aia upate kan zah rualin kan nu leh pate pawh kan zah tûr a lo ni.

Khawi emawa an kal chhuahte hian tar leh upate chu âwl an tum tlat ðhîn. Chu mai a ni lo, aia upate pawh an biak dâwnin, zah thiam takin an be ðhîn a, “Hei, nang kha,” an ti mai mai ngai lo va, koh dân tûr âwm takin an ko ðhîn a, ka pi, ka pu, ka u, ka ni, ka nu, ka pa tiin a koh dân âwmin an ko hrâm hrâm ðhîn a ni. Tûnlai chuan ðhenkhatin kan aia upate kan zah lo êm êm a, min biak pawhin kan inti ngêng a, kan chhâng ðha duh hauh lo va, min tih phei chuan, “Ka peih lo,” tia kalsan mai kan chîng ta hial a ni. Mahni chauha awm thei inti ni âwm takin mi dang mamawh lo âwm takin ‘ka nun hi ka ta a ni (It’s my life) te kan ti vêl ðhîn a, kan vânduai hunah

chuan mi dang puihna kan mamawh leh hle âwm si a. Hei hi Kristian naupang Pathian thu âwih te chuan kan tih ve hauh loh tûr a ni tih kan hriat reng a ðha âwm e.

He Mizo nun mawi tak mai leh chhuanawm tak aia upate zahna hi kan Mizo naupangten kan tlachham ta êm êm mai a, ruaiðheh honaah te, thil eiho dâwn rêng rêngin kan zînga upa berin a bâr hma chuan naupangin kan bâr khalh tûr a ni lo, tih te hi kan Mizo pi pute ngaih dân leh aia upate zahna mawi tak kha a ni ðhîn a, tûnah chuan keiin ei hmasa ila, anin ei hnuhnung se, tih hi kan ðhan hnan ta emaw tih tûr a ni. Hei hi chhawm nun thar zêl chi a ni. Hlaah pawh ti hian a awm a.

*“Ruai ðheha chaw kilhote hian,  
Bâr hmasatu an ni ngai lo;  
Upa berin a bâr hma chuan,  
Naupangin an bâr khalh ngai lo.”*

Hemi awmzia chu mahni hmasial lutuk avânga mi dangte hmakhalh tum tlat loh tûr, aia upate zaha, an thu ngaih chân tûr tihna a ni âwm e.

Awle, aia upate zah leh nu leh pate zah a ðûlzia te hi kan Bible pawh hian a lo sawi reng a ni. Thufingte 23:22-ah chuan, “I pa, a hringtu che thu pawm la, i nu chu a lo tarin hmusit suh,” a tih kha kan hriat reng a pawimawh khawp mai. Thufingte 17:6-ah chuan, “Tu leh fate hi upate lallukhum an ni a, fanaute ropuina chu an pate hi an ni,” a ti hial a ni. Chuti a nih chuan naupangte hi pi leh pute tân chuan an lallukhum an ni tihna a nih chuan naupang fel leh thu âwih thei, Pathian thu âwih bawk, nu leh pate leh aia upate thu âwih chu leiah an ropui ang a, vânah an la ropui leh zual dâwn a ni. Chuvângin, Kristian naupang zawng zawngte chuan thu âwih ðheuh i tum ang u.

## INTERVIEW

**LALRINNINGI**  
***TOPPER - HSLC 2019***

Tûn ÷umah hian Mizoram Board of School Education hnuoia High School Leaving Certificate (HSLC) 2019 result chhuaka pakhatna Lalrinningi kawmna kan târ lang dân a ni: (Editor = Ed. Lalrinningi = LR)

Ed : A hmasa berin inkawmna hun ÷ha tak min siamsak avângin ka lâwm hle mai.

LR : Kei pawh ka lâwm e.

Ed : I nu leh i pa hming min han hrilh phawt la.

LR : Ka pa chu Zothantluanga a ni a, ka nu chu Lalhlimpuii a ni.

Ed : Unau eng zât nge in niha, in unauah a eng zâtna nge i nih?

LR : Unau pali kan ni a, a naupang ber ka ni.

Ed : Kristian Naupang chanchinbu hi i lo chhiar ve ÷hîn em?

LR : Hostel-a ka luh hma chuan chhiar ve ÷hîn e. Ka thu ziak pawh hman deuh khân in chhuah tawh alâwm.

Ed : I school kal tawhna te min hrilh la, chûngah chuan a thiam pâwl i ni em?

LR : Nursery - Class V hi Young Learner's School (YLS), Sihphîrah ka kal a, Class VI-VIII hi Presbyterian English School, Sihphir Vênglaiah ka kal a, Class IX aţangin St. Joseph Higher Secondary School, Ramhlun North-ah ka kal. School hi ka kal tirh aţangin pakhatna ka ni deuh char char a, pahnihna nih zauh ÷um ka nei.

Ed : I school kal tawhnaah pawh i ti ÷ha ÷hîn hle mai a, lehkha hi i thiam thei ve hrim hrim nge, i zir peih vâng nia i hriat?

- LR : Ka thiam thei ve hrim hrimin ka hria. Zir peih chu a pawimawh rualin thiam tel ve a ngai ka ti.
- Ed : I lehkha zir dân min hrih thei em?
- LR : Zîng kârah dârkâr khat ka zir a, zânah chuan dârkâr 5-7 ka zir tlângpui.
- Ed : Khawi school-ah nge zir zawm i tum a, i zir zawhah eng nge nih i tum?
- LR : Ka school kalna pângngai St. Joseph Higher Secondary School-ah hian zir zawm ka tum a, Science Subject ka la ang. Ka zir zawh huna nih ka tum ber chu Doctorate Degree neih phawta IAS nih ka tum a ni.
- Ed : Lehkha i zir dâwnin Bible chhiar emaw, ÷awngtai emaw i ti ÷hîn em?
- LR : A hranpa tak chuan ka ti ngai lo, hostel-ah a huhovin zan tin Bible chhiar leh ÷awngtaina hun kan hmang a, chumi zawhah chuan study hall-ah kan kal a. A hranpaa ti vak kher lovin ÷hianta awm lai reng pawh hian ka rilruin ka ÷awngtai mawlh mawlh reng tho. Ka thiam chak vak loh châng te pawh hian ka rilruin ka ÷awngtai vat zêl.
- Ed : Nangmah i inhriat dânin nu leh pa thu âwih mi tak niin i inhria em?
- LR : Âwih ve pângngai. An thu han hriat châng chu a awm lo thei lo. Thil kan hriat thiam loh vânga tihtauh châng pawh ka ngah mai.
- Ed : ÷hian i ngaina em? I lehkha zir tibuai khawpin ÷hian i kâwm ÷hîn em?
- LR : ÷hian hi ka ngaina a; mahse, ka lehkha zir tibuai khawp erawh chuan ka kâwm ngai lo. ÷hian kawm leh lehkha zir chu ka chawhpawlh lo, ka thliar hrang.



- Ed : Hostel-ah emaw, school-ah emaw hotute hauh ngaiin i awm tawh em?
- LR : Zânah ka men rei avâng hian class-ah mutthlûk ka chîng a, dawhkân chungâ dintîr te, hmai phihtîr te ka tâwk fo mai. Thu âwih loh vâng a hranpa taka hrem chu ka la tâwk lo.
- Ed : Topper nih hi i lo inring lâwk rêng em? Nge, i beisei aia ðha result i nei?
- LR : Beisei lo hrim hrim. Ka beisei ai daiha ðha a ni.
- Ed : A nih leh i nu chawhmeh zuar i ðhutpui thu hi a lâh hle mai a, mi tam takin an sawi duh ber pawh a ni a. Nang hostel-ah i awm a, eng tik hunah nge i zawrhpu i ber ðhin?
- LR : Hostel-a kan awm avâng hian ka zawrhpu i reng thei lo va, exam chawlh leh thla khatah vawi khat chhuah theih hun kan nei a, chutah chuan ka zawrhpu i ðhin.
- Ed : Hei tûnlaiah tleirâwlten mobile phone an khawih nasa êm êm a, nangma pualin phone i nei tawh em? Facebook, Instagram, etc,-ah account i nei tawh rêng em?
- LR : Keima pualin phone ka la nei lo va, tûna matric ka pass hnu hian account chu min siamsak ve.
- Ed : Hetia Mizoram pum puia thiam ber dinhmuna i han ðing ta hi nangmahah nghawng eng nge a neih?
- LR : Mi hlawhtlinna te hi lâwmpui harsa ka ti ðhin a, nikum Krîsmas dâwn pawh khân Inter-High School Quiz-ah St. Pauls kan tluk lo va, ka chhiar nasa lutuk a, ka chhiar kha a rawn chhuak si lo va, kan tluk lohte kha ka lawmpui thei lo rêng rêng. Ka thil tawn aþang hian lâwmte lawmpuia, ðapte ðahpu i tih hi ka hrethiam ve chiah.

- Ed : Naupan têt aṭangin Sunday School i kal ṭhîn ngei ang a, kaikim lâwmman emaw, exam lâwmman emaw i dawng tawh em?
- LR : Hostel-a ka luh hma hian Zalawra Medal, Zalawra Medal Special leh Pi Zaii Medal ka dawng tawh.
- Ed : I zir laipui, he chanchinbu lo chhiartute hnêna sawi duh emaw, chah duh emaw i nei em?
- LR : Lal Isua nênn engkim a ropui a, Lal Isua nênn lehkha zir ila, kan hlawhtling mai dâwn a ni.
- Ed : Inkawmna hun ṭha tak min siamsak a, ka lâwm hle mai. I zir chhunzawm leh zêlna tûrah pawh a thiam ber ni zêl tûrin duhsakna ka hlân a che.
- LR : Kei pawh ka lâwm e.





# *Hriatzauna Htuang*

Tun ÷umah chuan ramngaw ropui tak mai chanchin ve thung aw ni ang! He ngawpui ropui tak mai, South America lam awm hi a hming chu ‘Amazon ngawpui’ a ni a. A hming hi Spain mi, thil zawngchhuaktu Francisco Orellana phuah a ni a. He ngawpuia a kal ÷um hian hmeichhe indomi ‘Thelcamiabas’ an tih te chuan an lo bei a. Chung hmeichhe indo mite chu Greek thawnthua hmeichhe huaisen Amazon te ang mai niin a hria a, Amazon tiin a phuah ta a ni an ti.

Khawvela Oxygen zaa sawmhnih (20%) teh meuh mai hi Amazon Rainforest an tih, Amazon ngawpui dur thim khup maiin a pek chhuah a ni a. He Amazon ngawpui hi a zauin a lian hle mai a, khawvela ngawpui zawng zawng belhkhawm chanve aia zau mah hi he ngawpui hian a aw h muk mai a.

Amazon ramngaw lei tih ÷hatna belhchhah tur hian Sahara thlaler a÷anga vaivut thlipui tleh chuan vaivut/lei eng emaw zat he ramngaw ah hian a va chhem lut ÷hin niin an sawi.



Amazon ramngaw zaa sawmruk (60%) hi Brazil ram chhung a ni a, Peru ram chhungah zaa sawmpathum (13%) awmin, Colombia ram chhungah zaa sawm (10%)



Poison Dart Frog

awmin a dangte hi Venezuela, Ecuador, Bolivia ramdang pathum Guyana, Suriname leh Grench Guiyana huam chhungah a awm bawk a ni.

Rannung chi hrang hrang zingah pawh insect an tih chi hrang maktaduai 2.5 zet te chu he Amazon ramngawa cheng hi an ni a. Hnim chi 40,000, sangha chi hrang hrang 3,000, sava chi 1,300, ramsa chi 420, tuia cheng chi chi 420 leh bawkvak chi chi 370 zet mai chu mumal taka cheng niin an hria a. Hei aia tam daih pawh hi a la ni thei bawk a ni.

A ramngaw a zauh ang bawk hian he ngawpui thim chhah mup mai chhungah hian hnam mawl an tih thin, tuma biak pawh lohva awm hnam 60 chuang zet awmin an hre bawk.



Bullet ant

Amazon ramngaw tluan mai hian Amazon luipui chu a luang tlang ruih mai a. A lui thui zawng ringawt pawh kilometre 6,400 zet mai niin khawvela lui sei ber dawttu a ni a, khawvela lui sei ber Nile luipui kilometre 6,650 aiin tlemin a tawi hret chauh a ni.

Amazon ngaw dur khup maia thing leh mau inthuah thip khup mai chuan a hnuai ramngaw pawh a ti thim khup mai a. Ruah a sur pawhin ruahin thinghnaah a far atanga minit 10 hnuah lei a thleng hman ve chauh thin a. Chutiang khawp chuan he ramngaw hi thing leh a hnah te chuan a khuh hneh a ni.



Rannung hlauhawm tak tak he ramngawah hian a tam hle mai a. Uṭawk chikhat (Poison Dart Frog) an tih te phe chu an vawikhat tûr tihchhuah hian mihring 10 zet a tihlum thei hial a. Uṭawk tûr

nei chi bakah maimawm, rul lian chi (Green Anaconda) te, keite chikhat (Jaguar), tui rûl hlauhawm zet mai (Electric Eel) te, rûl tûr nei hlauhawm tak mai (South American Rattlesnake) an tih te leh khawvela fanghmir hlauhawm ber pawl (Bullet ant) an tih mai, a seh pawh silaia kah tluk zeta na nia an sawi te, sangha ha hriam ṭha em em mai leh hlauhawm zet mai Red Bellied Piranha an tih te pawh he Amazon ramngawah hian an cheng a ni.



**Amazon luipui - khawvela lui sei ber dawttu chu**



Mizoram Presbyterian Kohhran hnuaiia zirna in hrang hrangte chanchin tawi tum tumah hian han târ lang ila.

**1. PC Girl's School:** PC Girl's School hi Mizorama school upa berte zînga mi a ni a. October 14-17, 2003 khân a kum 100-na an lâwm tawh a ni. A tîrah chuan 'Hmeichhe School' tih a ni thîn. He school hi Zosâp missionary-ten an dîn a ni a, Zosâptharan

(Edwin Rowlands) a enkawl a. Kum 1903-1904 chhûng a hotu ber (Head of the School) a ni. Zosâpthara chu Pi Hluuin (Catherine Jones, Zosaphluia nupui) a thlâk a. Kum 1916 thleng Headmistress hna a chelh a ni. Missionary te awm chhûng zawng kha chuan Headmistress hna hi missionary-ten an chelh thîn a, an haw hnuah Mizovin hotu ber nihna an chang ve chauh a ni. Kum 1952-a Mizoram District Council-a neih khân District council hnuaiiah School Education dah a ni a. Kohhranin school a neihte chu District Council kutah a hlân a, PC Girl's School erawh hi chu hlân tel lovin kohhranin a enkawl chhunzawm zêl a. Kum 1986 December thlaah Government Deficit Grant-in-aid system-a dah a ni.

**PC Girls' School**





He school-ah hian school zirlai bâkah Mizo kut them thiamna lam inzirtîr tel a ni a. Puantah te, laphiar te leh kut them thiamna lam thil tam tak inzirtîr a ni. An school uniform-pawh vai puan hmang lovin Mizo puantah an hmang a ni. He school hi a tîrah chuan Primary School (CI-III) thleng chauh zirna a ni a. Kum 1928 at angin Middle School-ah hlân chhoh a ni.

PC Girl's school-ah hian a din tirh aţanga kum 1968 thleng Zosâp missionary-ten hotu nihna an chelh a, mi pasarih laiin he school-ah hian hotu ber nihna an chelh hman a ni. Zosâp missionary zînga Miss Gwen Rees Roberts (Pi Teii) chu kum 1945-1968 chhûng (kum 23) lai Headmistress hna a thawh avângin 'Pi Teii School' tia hriat lâ a ni bawk tşîn. Mizo zînga he school-a Headmistress hmasa hmasa ber chu Pi Sâptâwni a ni a, ani hian kum 1968-1991 chhûng a thawk a. Pi Sâptâwni hi Pi Lalropuiin kum 1992 aţangin a thlâk a. Pi Lalropuii hi June 2014-ah pension-a a chhuah tâk avângin Pi Zaithanchhûngin Headmistress dinhmun hi a luah a. Tûnah hian zirlai 491 leh zirtirtu 30 bakah office lama thawk mi 7 an awm mêk a ni.

**2. Synod Higher Secondary School:** High School din hi thil awlai a ni lo va, Welsh Mission-in an zuam meuh lo va. Amaherawhchu, District Council kuta kohhran school zawng zawng hlan a nih hnu khân kohhran enkawl school awmchhun chu PC Girl's School chauh a ni ta a. Synod chuan ama puala High School din a duh ta a. Tichuan, kum 1962 March ni 8-ah a hawng ta a ni. A tîra a hming chu 'Presbyterian Church High School' tih a ni a. He school dinna





atân hian Presbyterian Kohhran dân zawhkim zawng zawngin pawisa 25 (siki) thawh tûra rêl a ni nghe nghe.

Kohhran chuan Synod High School chu a enkawl cho zêl a, sawrkâr aţangin ţanpuina tlêm tlêm a dawng ţhîn bawk. March 1985 aţangin Government Deficit Grant-in-aid system hnuaiah Synod Inkhâwmpui rêl angin dah a ni ta a ni. A tîrah chuan school building awm sa a awm loh avângin Mission Vêng YMA Hall-ah bul ţan a ni a. Sawrkârin Mission Vêngthlanga ram a pêkah school building sak a ni a, kum 1964-ah sak zawh a ni a, hetah hian insawn thlain tûn thlengin an awm ta a ni.

Mizoram sawrkârin Mizorama zirna system thlâkin class XI leh XII chu High School-a beta Higher System-a kal tûra a tih angin kum 1996 khân Science zirna hawn a ni a. Kum 1998-ah Arts zirna hawn leh a ni a. Hetia pawl XII thleng zirna a lo nih tâk avâng hian a hming pawh Synod Higher Secondary School tih a lo ni ta a ni. Tûnah hian zirtîrtu Principal leh Vice Principal telin 53 leh zirlai, High School leh Higher lam nêh 1168 an awm a. Non-teaching staff 12 an awm bawk. He school-a Headmaster hmasa ber chu Rev. Lalngûrauva a ni a, ani hian kum 1962-1969 thleng a thawk a. A hnuaiah hian mi pasarih headmaster an ni hman a. Tûna Principal hi Pu Lalvena Hnamte a ni.

**3. Presbyterian English School:** Mizoram zirna school-in tlâk hniam lam a pan deuh nia hriain kum 1992 Synod chuan ‘School ţha’ (English Medium) din ţhain a hria a. Hemi thu hi Synod Executive-in bawhzuiin ruahmanna te a duang a. A dinna hmasa atân Aizâwl





leh Sêrchhîp thlan a ni a. Kum 1995 kum tîrah SEC rêl angin Aizawl Zârkawtah February 7, 1995-ah hawn a ni a, Sêrchhîpah January 4, 1995-ah hawn a ni bawk.

Synod Executive Committee-in inkaihhruaina a duan zuiin Synod Education Board-in hma a la a, Synod-in school hawn thar leh a rêl aţang chuan kum tinin Presbyterian English School chu hawn belh a ni ta a. Tûnah hian (2018-2019 session angin) Presbyterian English School hi 140 hawn a ni ta a (class I thleng awmna 4, class II thleng awmna 2, class III thleng awmna 2, class IV thleng awmna 7, Class V thleng awmna 6, Class VI thleng awmna 14, Class VII thleng awmna 7, Class VIII thleng awmna 64, Class IX thleng awmna 6, Class X thleng awmna 28, a vaiin 140), zirtîrtu 1552 leh zirlai 29,970 an awm a. Zirtîrtu ni lo thawktu dang 131 an awm bawk. Tûnah hian hawn leh tûra buatsaih mêk leh hawn dîl Bial leh kohhran mal 11 a awm bawk.

Presbyterian English School hian HSLC exam-a distinction-a pass chinte hnênah pawisa fai chêng 10000 (sing khat) a pe thîn bawk a ni.

**4. Aizawl Theological College:** Mizorama Welsh missionary hmasa ber Zosâphluia (DE Jones) chuan kohhran lo ţhang zêl enkawltu tûr chher chhuahna tûrin kum 1907 khân Aizawlah ‘Aijal Theological School’ a din a, mi pangain an zir nghâl a ni. A tîrah chuan he school



hi kum khat course a ni a. Hun rei lo te hnuah kum thum course zir nâna siam a ni.

Sum lam indaih loh vâng te, Indopui II-na avâng te leh harsatna dang dang avângin Theological School chu kum 1935 ațanga 1950 kum tâwp thleng khâr a ni a. Hemi chhûng hian mi 62 vêlin an zir zo hman a ni. Tichuan, kum 1951 February thlaa Assembly Inkhâwmpui chuan Theological School hawn leh ța a ti a, Assembly Inkhâwmpui zawha hawn nghâl tûrin a rêl a. Principal atân JM Llyod-a ruat a ni a, ani hian chawlh a lâk avângin kum 1955-1956 chhûng Theological School chu khâr a ni leh a, Pu Lloyd-a chawlh hmang zo a lo hân leh hawn leh a ni a. Pu Lloyd-a hian September 28, 1964 thleng Principal hna a chelh a ni.

Welsh Mission-in kum 57 (1907-1964) chhûng zet Theological School-a hotu ber nihna an chelh hnuin Rev. C. Pazâwna chuan Welsh Mission Principal hnuhung ber JM Lloyd-a chu a thlâk ta a. Kum 1981 thleng he hna hi a thawk. Tûna Principal hna chelh mêk chu Rev. Prof. Vânlalnghâka Râlte a ni.

Theological School hi a din tîrh chuan Diploma course zirna a ni a, kum 1965 ațangin L.Th (Licentiate in Theology) zirna hawn a ni a, hemi kum ațang hian Theological School chu College dinhmunâ hlân kai a ni ta a, 'Aizawl Theological College' tih a lo ni ta a ni. L.Th hi kum thum course a ni a, matric pass chin tân zir theih a ni. India

rama zirna kalpui dân danglam zêlin Theology zirna a nghawng zêl lo thei lo va, Secular College-a degree course zir hmain Pre University Course (PUC) zir a ngai a. PUC pass lo chuan BA an zir theih loh avângin Serampore University hnuai Theology zir dân pawh en that a lo ngai ta a. L.Th. course chu a laklawh tâk avângin B.Th. (Bachelor of Theology) zirna siam a lo ngai ta a. Tichuan, kum 1971 ațangin Aijal Theological College-ah B.Th. zirna hawn a ni ta a ni. Theological Education Board-in 'Aijal Theological College' tih hi 'Aizawl Theological College' tia thlâk a rawtna chu 1976 Synod inkhâwpui chuan pawmin hman nghâl a ni bawk.

Aizawl Theological College chu BD (Bachelor of Divinity) zirna atâna buatsaih chhoh zêl a ni a. Gospel Centenary lawm tan ni January 11, 1994-ah Welsh missionary zînga Principal hna chelh hnuhung ber Rev. JM Llyod-a chuan BD zir theihna tûr college building, Durtlânga mi chu a hawng ta a. BD zirna chu October 13, 1994-ah Mission Vêng Kohhran Biak Inah hawn a ni a. B.Th. zirna leh BD zirna chu hun eng emaw ti chen a kal kawp hnuin kum 2001-2002 session ațangin B.Th. zirna chu tihtâwp a ni hlen ta a ni.

Aizawl Theological College chuan hma sâwn zêlin M.Th. (Master of Theology) zirna chu kum 2002-2003 session ațangin hawn a ni leh a. Kum 2013 ațangin Senate of Serampore College (Univ) hnuai Theological Study Centre-ah hlân kai a ni a, Christian Theology, New Testament leh Missiology-ah te D.Th. zirna kalpui mêk a ni. Tûn dinmun hian zirlai BD 108, M.Th. 56, D.Th. 6, Faculty staff 32 leh non-teaching staff 34 an awm mêk.

**5. Missionary Training College:** Missionary Training College (MTC) hi a tîrah chuan Missionary Training Department angin kum 1978 ațangin khân Aizawl Theological College-ah din a ni a. Kum 10 chuang lai chu missionary hna thawk laite intuai tharna leh lâk tharte training-na anga kalpui a ni a, kum 1991 ațang erawh chuan Pre-Service Training tûr pawh lâk tan a ni ta a ni. Kum 1995-a Durtlânga ATC sawn chhoh a nih khân Missionary Training Department pawh hi sawn tel ve a ni a. Kum 1996 kum tîr ațangin Mission Vêngthlanga Theological College hmun hluiah suan thlain Missionary Training Centre tih a ni a. Missionary hna lo thawk rei tawhte intuai tharna atân refresher

course pawh kum 2000 aṭang khân kalpui a ni.

Kum 2007 aṭ angin campus hran neiin tûna a awmna hmunah hian suan luh a ni leh a. Kum 2010 aṭangin B. Miss degree zirna college-ah hlân kai a ni a. Senate Commission-in kum 2012-a a rawn en fiah hnuah B. Miss degree zirna college atân a pawm zui a. Tichuan, kum 2013



aṭang khân MTC chu Senate of Serampore College (Univ) hnuah B. Miss degree zirna college puitling hmasa ber a lo ni ta a ni. Tûnah hian zirtîrtu 14, non-teaching staff 10 leh B. Miss zirlai 47 an awm mêk a, an Principal chu Rev. Vânlalrova Khiangte a ni.





# CHEI RAWH LE



# KA HMUH ANG HMU THEI RAWH

---

*A chung a lemziak chi hnih khi ngun takin en la, a inan lohna chi ruk hmu thei rawh.*

A hnuaiah hian a chhanna lo ziaak la:

1. ....
2. ....
3. ....
4. ....
5. ....
6. ....





Kolkata Naupang Sunday School zirlaiten Good Friday-ah lem an chang

To,



**DINTHAR SAIRANG SENIOR DEPARTMENT 2019**

[www.mizoramynod.org](http://www.mizoramynod.org)